

Za
742



X 2044097 Leichpredigt
Ausß der 2. Epistel S. Pauli
an die Corinth. am 12. Cap.

Key dem Begrebnis
des Edlen vnd Ervesten Jung-
ckern/Daniel von Arnimbs Moritzen se-
ligen Sohn/auff Stasturt vñ Erb-
gessen zu Crossaw:

Welcher ein geraume zeit in bey-
richtigkeit gelegen/Endlich aber durch G D Etes
gnade/wider zu guter vernunft kommen / vñnd am tage
S. Laurentij zu Magdeburg/im HERN saafft vñnd seliglich
entschlaffen/daselbst auch bey der Domkirchen/mit Christliche
Ceremonien zur erden bestattet worden ist/ Mittwoch nach
S. Bartholomæi/ am 25 Augusti Anno Christi 1602.

Derwegen in dieser Predigt sondere meldung ge-
schicht/wie man sich in solche vñ dergleichen
fälle richten / vñnd davon vrtheilen
solle.

UNIVERSITÄTS-BIBLIOTHEK
HALLE
(SIALE)

Gehalten durch
Philipp Han/D. vñnd Domprediger zu
Magdeburg/

BIBLIOTHEK
PONICK

Gedruckt bey Andreas Duncker/

M. DCII.



100 11 11 11

11 11

11 11

11 11

11 11





Text

Der Reichpredige.

Aus

Der 2. Epistel an die Corinth.

am 12. Capittel. v. 7. 8. 9.

So schreibet S. Paulus:

In und v. 7. 8. 9. mit mir in der Art der Anbarmung abzugeben



S ist Mir gegeben ein
Pfal ins fleisch / nemlich
des Sathans Engel / der
mich mit säustē schlahe /
auf das ich mich nicht oberhebe. Da=
für ich drey mal den H E X X N gefle=
het habe / das er von mir wiche / vñ er
hat zu mir gesagt / las dir an meiner
Gnade genügen / Denn meine
Krafft ist in den Schwachen
mechtig.

A ij

Was

Christliche

Exordium.

Was man im wolbekandten Verßlin vñ gemeinen Sprich
wort von der Harmonia Musica zu sagen pflegt:

Omnia tunc bona sunt, clausula quando bona est
Wenn das ende gut ist/so ist es alles gut.

Eben das kan nicht vnbequem auff der Christenmenschen le-
ben vnd sterben gedutet vnd gezogen werden.

Denn gleich wie es mit der Musica die gelegenheit hat/das/
ob schon der gesang zu zeiten hart angehet/ schwere fugen hat/ vnd
sich offte im mittel stößet / vnd aber zu ende desselben/ die Stimmen
fein lieblich zusammen gehen vnd wol schliessen/ so bleibet dem ge-
sang der Ruhmb/ das es ein guter gesang sey:

Also vnd gleicher gestalt/wird nicht vnbillich von der Christen
menschen leben vnd sterben geurtheilet/das/wie harten anstoß man-
cher in dieser Welt gehabt/viel elend vnd jammer erlitten vnd aus-
gestanden/vnd ihm sonsten etwan erbärmlichen ergangen ist; Je-
doch wenn das Ende vnd der Abscheid aus dieser Welt gut/ vnd
dis zeitliche leben Christlich vnd Seliglich beschlossen ist/so wird
des voriagen Jammers vnd elendes gleich dabey vergessen vnd da-
durch alles gut gemacht/sol vnd mus auch gut heißen/sein vnd blei-
ben/alles was hernach folget.

Ja es ist mit des Menschen leben vnd sterben hier auff erden/
wie mit einen Bogen oder büchsen schützen/wenn der im letzten ab-
drucke recht zieleet vnd helt/so scheust er gewis: Also thut freylich das
wolabdrucken im sterben bey den Menschen auch das beste/vnd fol-
get darauff vngezweiffelt das rechte ehren kränlein/ die Krone des
lebens vnd der ewigen gerechtigkeit/freude vñ herligkeit/ gegen wel-
cher/ dieser zeit leiden nicht wert zu achten ist. Röm. 8. Daher
man in der Kirchen singet:

D Wol ist hie gewesen/
**Welcher wie Simeon entschlefft/
Sein Sünd erkent/Christum ergreiffet/
So muß man selig sterben.**

Vnd wie D. Luther in einem brieffe Anno 1536 geschrieben:
Ein seliges ende ist ein schatz vberschatz/vñ ein ewiger trost.

Leichpredigt.

Es sol aber icht gemeltes sprichwort vñ gleichnis niemand mißbrau-
che zur sicherheit / das er etwan mit dē gottlose Weltkindern geden-
cken oder sagen möchte: Hat es die meinung/das es nur auff einem
guten ende bestehet/ so wil ich meiner Jugend brauchen zur wollust
vnd allerhand sünden meines gefallen/ vnd doch zu lezt wol zuse-
hen / wie ich mich noch mit Gott versüne / vnd denn wol abtrucken
möge.

Nein lieben Christen/diese sicherheit thut es nicht/ denn da kan
einem balde das ziel verrücket/ vnd das abtrucken zu kurz werden/
das er einen fehl schuß thue /vnd hernach in ewigkeit verloren sein
vnd bleiben müsse. Wie wir abermal singen:

Vnd wenn der mensch nimmer leben mag/
So seht er an eine grosse klag/
Wil sich erst Gott ergeben/
Ich fürcht fürwar die Göttlich gnade/
So er alzeit verspottet hat/
Wird schwerlich ob ihm schweben.

Denn ob es wol war ist/wie man im Latein sagt: Poenitentia
Vera, nunquam sera, Rechte buß kömpt nie zu spat/welches das
Exempel des Schechers am Creuz bezeuget / Lucæ 23. Capittel
So heist es doch wiederumb auch: Poenitentia sera, raro Ve-
ra, spate Buß/ selten rechte Buß. Derwegen der weise man Syrach
vermanet vnd spricht cap. 5. Beruech nicht dich zum HErrn zube-
kehren/ vnd schieb es nicht von einem tag auff den andern/den sein
zorn kömpt plözlich/vnd wirds rechen vnd dich verderben.

Do aber ein Christen mensch von Jugend ahn/in wahrer got-
tesfurcht erzogen/ vnd daben gleichwol etwan einen harten stand
vnd groß elend in seinem leben außstehen müssen/ Ecklich aber mit
ihm zum seligen end kömpt/da ist freulich nach vorermelten sprich-
wort alles gut/vnd heisset recht mit ihm/wie wir bey dem begrebnis
singen.

Sein Jammer / trübsal vnd elend/
Ist kommen zu ein seligen end/
Er hat getragen Christi Joch/
Ist gestorben vnd lebet noch.

A. iij.

Wenn

Christliche

Wenn es denn nicht mit unsern jüngstverstorbenen vnd in
Gott ruhenden Juncfern / dem Edlen vnd Ehrvesten Daniel
von Arnim / auff Staffurd vñ zu Eruffaw Erbgesessen / des alten /
frommen / vnd vmb dis löbliche Erbstift wolverdienten / Moriken
von Arnims seligen Son / dessen Leichnam wir ist zum ruhebetlein
beleitet haben / auch die gelegenheit / mehrerwentem Sprichwort
nach / erlanget / das / wie schweren zustand es eine geraume zeit her
mit ihm gehabt / dennoch das ende damit gut worden / also das er
sein trübseliges leben Christlich vnd wol geschlossen.

So ist ja nicht allein Gott dem allmechtigen in seiner gemeine
herzlich dafür zu dancken / sondern es wird auch billich demselben
zur letzten ehre vnd willen / der betrübtten Adlichen freundschaft /
vnd vns allen / zu notwendigem vnterricht vnd trost / bey dieser seiner
Leichbestattung / eine predigt aus Gottes wort angestellet vnd gehalten.

Darzu wir den iherverlesenen Text S. Pauli. 2. Cor. 12. für vns
nehmen wollen / auf das wir desto mehr vrsach haben / von dem ja-
mmer vnd elend des menschlichen Lebens vnd der darauff folgenden
seligkeit / so wol auch des iherverstorbenen / zu reden vnd zu handeln / vñ
wie wir Christen vns in solche vnd dergleichen fälle recht schicken /
darin verhalten / trösten vnd davon vrtheilen sollen / das es GOTT
zu Ehren / vnd vns zur besserung gereichen möge.

PROPOSITIO.

Damit wir aber ohn weitem vmbschweiff die vorlesene wort
S. Pauli Erwer l. ordentlich fürtragen vñ erkleren / so haben wir da-
rinnen fürnemlich dreyerley personen zu beschen / vñ mit allem fleiß
in acht zu nemen.

1. Angelus Satanæ, des Sathans Engel / von welchem der text
bald im anfang meldet / was der sich an dem auferwelten Rüstzeug
vnterstanden / vnd an im geübet habe / durch Gottes vordienuß.

2. Ipse Apostolus, der Apostel S. Paulus / wie der sich in solchem
schweren zustand erzeiget vnd verhalten.

3. Christus Dominus, der Sohn Gottes Christus Jesus /
als der rechte Jehova vnd Herr / wie vnd womit der S. Pau-
lum getröset habe.

In dieser Ordnung wollen wir den abgelesenen text nacheinander
kirchlich

Leichpredigt.

hürklich erklerē/ vñ w3 wir stückweiß dabey zu vnser erbarung mer-
cken vñ behalten sollen/ erinnern vnd anzeigen/ auch so viel sich lei-
den wil/ des verstorbenen Jungkern/ Daniel von Arnims
seligen/ Leben/ Zustand vnd Christlichen abscheid mitberühren.

Bitten aber nochmals den getrewen Goet vñ Vater im himel/
wie zuvor geschehen/ das er vns hierzu seine gnad/ Krafft vnd Trost-
geist/ vmb Christi vnser8 einigen Erlösers willen/ verleihen vnd ge-
ben wolle/ Amen.

PRIMA PARS.

W3 nun den verlesenen text anlanget/ so klagt der Apostel Paul.
anfenglich8 darin vber des Satans Engel vnd spricht: Es
ist mir gegeben ein Pfal ins fleisch / nemlich des
Satans Engel/ der mich mit fäusten schlage.

Diese wort habē den Kirchelerern viel mühe vñ arbeit gemacht/
das sie den rechten verstand derselben anzeigen mochten / sonderlich
was der Apostel meine/ mit dem wörtlein σκόλοψ/ ein Pfal ins
fleisch:

Vnd schreibet D. Luther in der Kirchenpostill Dominica Se-
xagesimæ, das viel Lehrer diesen Pfal bisher / (nemlich im Bab-
stumb) gedeutet haben/ als sey es des fleisches anfechtung gewesen
zur vnterscheit. Das hat der Lateinische text gemacht/ der da lauter
Stimulus carnis, ein Stachel des Fleisches.

Aber dz mag nicht bestehen/ sagt D. Luth./ Einemal der Grie-
chische text dawider ist/ vnd S. Paulus die soudere gab von Gott
gehabt/ außer der ehe keusch zu leben/ das er auch. I. Cor. 7 wünschet
vnd sager: Ich wolte/ das sie alle weren wie ich bin/ aber ein jegli-
cher hat seine eigene gab/ vnd wer die nicht hat/ dem ist es besser frey-
en/ den brünst leiden.

Sondern S. Paul. redet alhier also vom pfal ins fleisch/
dz es gar nahe dem Teutschen Sprichwort glicher: Der knüttel ist
dem hunde an den hals gebunden / Als wolt er sagen: Gleich wie
man dem hunde den knüttel/ vñ den Beern einen rineken in die Na-
sen/ vnd dem Pferde einen zaum ins maul/ der Sam einen knebel in
den Rachen bindet/ das sie nicht zu sehr lauffen/ beissen / muthwillig
sein / Also ist mir auch geschehen / das ich einen Pfal oder Knüttel
hab an meinem leibe/ das ich mich nicht vberhebe. Was

Christliche

Was aber derselbige psal vnd knüttel sey/deutet er bald selbst/
nemlich des **Satans Engel**/das ist ein Teuffel/der mich mit
seusten schlage / vnd getroffen auff mich poche vnd tresche mit seinen
pfeilen/also das ich vor angst oft nicht weiß /wo auß / sondern win-
seln vnd klagen mus Röm.7. Ich elender Mensch / wer wil mich
doch erlösen von dem leibe dieses todes? dahin sihet D. Luthers scho-
lion bey dem Wörtlin psal. Psal/spricht er / heisset hie nit des flei-
sches anfechtung zur vnkeuschheit/sondern grosse plage vnd schre-
cken vom teuffel. Den psal ist /da man die leute angespiesset/gecreu-
tiget oder gehendet hat.

Ob nun wol D. Hieronimus vnd andere meinen/das es eine
gefährliche heuptkrankheit oder andere Leibschwachheit gewesen/
wie dann die Schrifft nicht allein von den besessenen vnd furiosis,
sondern auch von dē siechē/franckē vnd bresthaffte also zu reden pfe-
ge. Act. 10. das sie vom teuffel sein vberweltiget gewesen/vnd ihre
schwachheiten freylich auchgenennet werden mögen **faustschlä-
ge des Satans Engel**/Durch Gottes verhengnis.

Jedoch so zeigt d; Wörtlein σκόλοϛ, ein psal ins fleisch/
summam acerbitatem tentationum, die innerlichen/schweren/
tieffengedanken/ vnd allerheftigsten anfechtungen / die entweder
entstehē I. Ex recordatione & memoria tristissimi peccati, Wenn
die sünd vñ d; belldende hündlein im gewissen auffwacht/als das S.
Paulus erwan zurüet gedacht hab an die greuliche verfolgung/die
er an den heiligen vor seiner bekerung gebbet hat/davon er selbst be-
kennt/I Cor. 15. 1. Tim. 1. Gal. 1. Hæc enim vis est atq; natura pec-
cati, ut tum quoq; cum remissum est, non leviter conscientias
excruciet, Das ist der sünden natur vnd eigenschafft/das wenn sie
schon von Gott vergeben ist/dennoch die Gewissen zu zeiten plaget vñ
martert. Wie auch an König Davidt zusehē/da der an seinē schwe-
ren sündēfal/mord vnd ehebruch gedacht / was es jm für anfechtung
gebracht habe/ also das er darüber seufftet vnd klaget psal. 38.
Sagittæ tuæ infixæ sunt mihi, spricht er zu Gott/deine pfeile ste-
cken in mir/vund deine hand trücket mich / es ist nichts gesundes an
meinem leibe für deinen dreyen/vnd ist kein fried in meinen gebei-
nen für meiner sünde/ ich gehe krum vnd sehr gebücket/den ganzen
tag

Reichpredigt.

tag zehet ich trawrich. Drumb man die Sünd ja nicht so gering achten/oder dabey so sicher sein solte/wie leider wol offft geschicht.

Ja solche anfechtung vnd faustschläge des Satans Engel/entstehen zu zeiten auch/2. Ex consideratione prædestinationis divinæ, von der ewigen vernehmung/das S. Paulus etwã in die anfechtung kommẽ ist/als ob er in die zal der außeweltẽ nicht gehöret / oder der ewigen seligkeit nicht würdig were.

Dem was das für ein anfechtung vnd faustschlag des Satans Engel sey/dessen gedencet D. Hieronymus Beller / ein fürnehmer vñ recht gut Lutherischer Theologus, der selbst auch in dem Spital Kranck gelegen / vnd schreibet/dz sich einer solte so lieb mit glühenden zangen zerreißen lassen/ dem solche anfechtung leiden.

Anderer Kirchenlehrer stehen auch wol in den gedanken / das es gewesen sey Subita animi consternatio ein solch groß schrecken vnd plötzliche entsetzung/dz wenn es ihm ankommen/ er nicht gewußt habe/wie ihm geschehen sey/vnd er drüber hette vergehen mögen.

Wie wir dergleichen Johan. 12. von dem Herrn Christo lesen/da er anfehret vnd spricht: Ist ist meine Seele betrübt/ vnd was sol ich sagen: Vater hilf mir aus der stunde.

Aber dem sey mhn wie ihm wolle / weil S. Paulus selbst nicht eigentlich meldet/was es gewesen/so müssen wir es lassen ein heimlich leiden sein/welches niemand denn S. Paulus gewußt hat / vnd ist gnug/ das wir so viel wissen/ dz gleich wie ihm Gott hat so grosse offenbarüg gethan/ dz sie kein mensch wissen kan/so hat er ihm auch dagegen einen solchen knüttel gelegt/ das auch niemand wisse denn er allein. In summa/ es hat ihn der Teufel durch Gottes verhengniß mit dem psal vñ knüttel dermassen geblewet/das es mit ihm geheissen/wie er 2. Cor. 7. redet: Intus terrores, foris pugnae, außwendig streit / inwendig furcht/dadurch sein leib vñ alle kräfte außgemattet vnd geschwächet / dennoch aber die seele dabey erhalten worden ist.

Vnd dessen haben wir nicht allein vns von S. Paul: zuerinnern als einem hocheleuchten Apostel im Kirchenstand / sondern dergleichen exempel wird vns auch fürgestellt / im weltlichen Regiment / an dem fürnehmen Monarchen vnd Babylonischen Könige Nebucadnezar / davon Dan. 4 zu lesen / das ihm freylich auch ein

psal

Christliche

psal ins fleisch gegeben / nemlich des Satans Engel der ihn also mit fäusten geschlagē / durch Goites verheugnis / dz das menschliche hertz von ihm genommen / vnd ihm ein viehisch hertz gegeben / er mit ketten gebunden vnd von den leuten verstoffen worden / sieben Jahr lang.

Also im gemeinen hauswesen / kan hieher gezogen werden / dz Exempel vnd historia Luc. 13. von einem weibe / welches einen Geist der Krauchheit gehabt 18. Jahr / davon sie gar krumb worden / vnd nicht auffstehen kunte / war dennoch ein from weib / die Gott gepreiset hatt.

Accommodatio textus ad personam defuncti

Eben mihi fast gleichen kläglichen zustand vnd gelegenheit / hat es eine zeiter mit dem verstorbenen Jungfern / Daniel von Armin seligen auch gehabt / welcher zwar von fürnemen / Adelichen Eltern / als dem Edlen / Bestrengen vnd Ernvesten Morizen vñ Armin Weiland Fürstl. Magdeburgischen fürnemen Landraht / auff Staßfurt vnd Erbgesessen zu Crüssau seligen / vnd der Edlen / Gottseligen vnd Ehrentugentamen Matronen / Frauen Lucretia von Ditzhauwen / An. Tausend fünff hundert vnd sieben vnd sechzig am tag S. Nicolai geboren / von denen er zu warer Gottesfurcht erzogē vnd zum studiren gehalten / wie er denn in der jugent / nebē der Jungen Herrschaft zu Hall am hoff gewesen vnd vnterwiesen worden / da insonderheit vnser gnedigster Herr / der ihlige Churfürst zu Brandenburg / wegen seiner frömbkeit / gutteningenij vnd wol verhaltens / einen sondern gnedigen willen zu ihm getragen vnd ihn fragen lassen / ob er lieber zu hofe bleiben vnd auff die Reuterey sich begeben / oder ferner studieren wolte? vñ er sich erkleret / dz er lieber studieren möchte / haben ihr Churf. Gn. selbst geraten / weil er allbereit einē seinen profectum / das er gen Wittenberg möchte verschicket werden / wie denn geschhehen. Denn ich ihn alda nicht allem wol gekant / sondern Anno 1586. beyhm herrn Doctore Polycarpo / neben ihm auch an einem Tisch gewesen / hatte einen Præceptorem. M. Johannes Salfelder genant / der sich vber seinem fleiß verwundert / das er immer vber den büchern gelegen / Morgens vnd abends die Bibel gelesen / vnd fleißig studiret / wie noch eines theils / aus seinen büchern vnd exercitijs Ityli / die er daselbst gemacht / zu sehen ist / dz zu hoffē war / er solte ein fürnemer vnd gelehrter man worden sein. Aber

Leichpredigt

Aber es hat sich leyder darumahl die Melancholen vnd die tieffen Gedancken bey ihm angefangen zu finden/das er beytm studiren/vber der Mahlzeit vnd sonsten/sich oft seltsam geberdet/ vnd ob wol neben dem / eine reiffende Sicht in den Gliedern sich ereignet/ daran er auch von dem Medico D. Salomone Alberti zu Wittenberg curiret worden/ hat er doch damahls selbst an seine heralieber/ nunmehr selige Mutter geschrieben / das es mit der Chur nicht aufgerichtet/ vnd dem Haupt dadurch nichts geholffen sey / deswegen er auch bald darauff von dainenwider zu Hause genommen worden.

Ist darauff ins Carlsbad vorschicket / vnd hernach gen Prag gezogen/in willens/mit einem von Alvensleben in Belschland zu reysen. Weil er aber je lenger je mehr in Schwermuth gerathen/ ist er von dainen auch abgefodert/vnd zu Staßfurt auff dem hause gehalten worden/da er nachmals in solche Beyrichtigkeit gefallen/ das man besorgen müssen / er möchte ihm selbst / oder andern leyd thun/darumb er von seinem Schwager vnd Vormunden Jacob von Blanckenburg Rittmeistern seligen / gen Widerstett genommen/ daselbst in verwahrung gehalten / vnd endlich angeschlossen / vnd hat also zu Staßfurt vnd alhier bey seinem Bruder dem Hoch vnd Ehrwürd. Edlen vnd Ehrn. Herrn Christoph. von Arnim / dieser primat Erzbischofflichen Kirchen zu Magdeburg Domherrn vnd Camerario, in solchem Elende / bis ins Zehende Jahr anbracht. Vnd ob wol zu vermuten/das ihm etwan ein piltzgen oder anders beybracht / dadurch dieser vnfall verursachet vnd vermehret worden / so hat man doch dessen keine gewisse nachrichtung jemals haben können.

Sondern ist ungerweiffelt dafür zu halten/ das es durch Gottes verhengnis geschehen/vnd des Satans Engel ihn also mit fausten geschlagen habe/vnd der $\sigma\kappa\omicron\lambda\omicron\tau$ oder psal ihm auch ins fleisch gegeben worden/ das er mit schwerer ansechtung/ grosser angst vñ schrecken geplaget worden vnd seinen leib also gequelet hat/ das es zu verwundern/ wie er es so lang aufstehen können / vnd daher zu spüren gewesen/das es vnmenshlich/vnd also/wie gemelt/des Satans faustschläge/durch Gottes verhengnis / gewesen.

Daran deü/wie leicht zu erachten/die liebe alte selige mutter/ die sonsten

Ehrliche

sonsten Creutz vnd leydens voll war / dergleichen seine stete Brüder /
Schwestern vnd Freunde / groß elend vnd hertzend gesehen / vnd
dasselbe zu lindern / vnd seiner treulich vnd fleissig zuwarren / alle
mögliche mittel versucht haben / davon allhie fernere meldung zu
thun vnmöglich.

Vfus primæ partis generalis.

I. Doctrina. Wir geliebte Christen vnd Freunde / sollen auf
diesem vnd den oberzehlten Exempeln S. Pauli vnd dergleichen /
sehen vnd erkennen lernen / des Satans Mordwerck an den Men-
schen / vnd das trawrige Adamsbilde / dazu es nach dem sündenfall
mit den Menschen kommen ist / wenn Gott verhenat vnd die hand
abzeucht. Vnd das alle Krankheiten / Beyrichtigkeit / Anfechtung /
Anast vnd Beschwoerung / so dem Menschen zustehet in diesem Le-
ben / anders nichts sein denn Faustschläge des Satans engel / durch
Gottes verhengnuß.

2. Exhortatio. Welches wir vns denn ferner zum Busspie-
gel für augen stellen sollen / das wir vns hüten für sicherheit vnd ge-
dencken / weil wir alle Adamskinder sind / das des Satans Engel
vns allen auch nachschleiche / vnd mit vns leicht geschehen sey / das er
vns mit fausten schlage / wo Gott verhengen möchte.

Quod enim cuiquam accidit, cuius accidere potest.

Was einem begegnet / das kan andern auch begegnen / Ideo
qui stat, videat ne cadat, drumw wer sich lest düncken / er stehe / der
mag wol zusehen / das er nicht falle / 1. Corinth. 10. Wie denn Chri-
stus selbst Luc. 23. zu Petro sagt: Simon / Simon / si e der Sa-
tanus hat ewer begehret / das er euch möchte sichten / wie den Wei-
zen / Derwegen send mich ern vnd wachet / denn ewer Widersacher
der Teuffel gehet vmbher wie ein brillender Lewe / vnd suchet / wel-
chen er verschlinge / dem widerstehet fest im glauben / 1. Petr. 5. vnd
betet allezeit.

Wir bitten dich HErr Jesu Christ

Behüt vns für des Teuffels list /

Der stets nach vnser Seelen tracht /

Daz er an vns hab keine macht.

Insonderheit sollen die oberzehlten Exempel / vnbusfertigen
Leuten ein schrecken einjagen / das sie in sich schlagen / vnd gedencen /
was Luc. 23. Christus sagt: geschicht das am grünen holz / was will

am

Leichpredigt

am durren geschehen? Sehet das gericht vom Hause Gottes an / was will es für ein ende werden / mit denen / die dem Evangelio Gottes nicht glauben / 1. Pet. 4.

3. Consolatio. Endlich sollen wir auch den Trost dabey merken / das / weil solche faul schläge des Satans / Verhinderung und dergleichen unfälle der Menschen / durch Gottes verhängnis geschehen / wie S. Paulus sagt / das ihm gegeben sey ein Pfahl ins fleisch / auff das er sich nicht vberhebe / das es daher nicht ein lauter zornzeichen Gottes sey / sondern er thut offte ein stömbd weret / auff ein ander weis / damit er sein eyge weret thut / auff ein ander weis. Esai. 23, Er weiß die Gottsfürchtigen aus der ver suchung zuerlösen / 2. Petr. 3. Ja er weiß sie darin zuerhalten / das ob er als ich einen Menschen vbergibt dem Satan / zum verderben des fleisches / mache ers doch also / das der Geist selig bleib / und erhalten werd auff den tag des Herrn Jesu / 1. Cor. 5. denn er ist getrew / der vns nit lest versuchē vber vnser vermögen / sondern macht es also / dz die versuchung ein ende gewinnet / dz wirs ertragen könnē / 1. Cor. 10.

Des sollen wir im gewis trawen / und vns damit trösten / in solchen und dergleichen unfällen / wie wir hernach ferner erinnern wellē.

Secunda pars.

Wir müssen nun auch zum andern Theil oder Hauptstück des vorlesenen texts schreiten / da vns fürgestellt wird ipse Apostolus / die Person S. Pauli / wie der sich in seinem schweren zustande / da ja des Satans engel mit säusten geschlagen / erzeuget und verhalten hab. Davon berichtet er nun selbst allhier also und spricht: **Dafür ich dreymal den Herrn geflehet hab das er von mir wiche.**

Weil S. Paulus weiß und verstehet / dz im der pfahl ins fleisch gegeben ist von Gott / oder durch Gottes verhängnis / so sihet er darin auch nicht auff andere causas propinquas, sondern auff die causam remotā, auff vnsern Herrn Gott / der diß also vber ihn verhänget hat / vñ wenn er ein wenig lust hat / für des Satans säustschlägen / so wendet er sich zu Gott mit dem gebet / weil er selbst gesagt hat / Psal 50. Ruffe mich an in der noth / so will ich dich erretten / und du solt mich preisen.

Das es aber S. Paulo ein rechter ernst mit seinem gebet gewesen / gibt er zuersehen mit dem wörtlin flehen / sagt nit schlecht / dafür

W u

ich denn

Christliche

ich den HErrn gebeten/sondern dafür ich den HErrn geflehet hab/gleich wie von Christo Ebræ. 5. steht: Das er am tage seines fleisches vnd in seinem leiden gebet vnd flehen mit starcken geschrey vnd threnen geopfert hab/zu dem/ der im von tode könte ausschelffen.

Vnd solches thut er auch nicht einmahl / sondern wie er sagt/ Drey mal hab er den Herrn geflehet/das ist numerus finitus pro infinito, viel vnd offemals hat er sein gebet widerholet / vnd vmb erlösung von des Sathans Engel bey Gott dem Herrn ernstlich angelanget. Ist aber doch nicht alsbalt errettet worden / wie hernach aus dem dritten stücklein vnd der antwort des Sohns Gottes zuvernehmen/sondern hat sich ein geraume zeit des Satans Engel mit fäusten schlagen lassen/vñ seinen stachel gar wol leiden müssen/nach Gottes willen vnd verhengniß.

Vsus secundæ partis generalis.

1. Doctrina. Daben wir denn nun auch zu lernen/dz dis das einige vnd beste mittel sey / wenn wir in noht vnd elend stecken / das wir vns zum lieben Gebet halten / vnd damit zu Gott ruffen vmb rettung aus der Angst vnd Noht/ das wir mit David sagen/ Psal. 39. HErr/wende deine plage von mir/denn ich bin verschmacht von der straffe deiner hand. Sonderlich wenn wir oder andere des Satans faustschläge fühlen. Denn wie Christus sagt Matth. 17. Diese art fehret nicht auß/denn durch beten vnd fasten.

Es mus aber solch gebet ein recht stehen sein / vnd von herten gehen/denn der vater will solche haben die in anbeten im geist vnd in der warheit: Joh. 4. Vnd das gebet des glaubens wird dem franken helfen / vnd der HErr wird ihn auffrichten/vnd do er hat sünde geihan werden sie ihm vergeben sein / Drumb bekenne einer dem andern seine Sünd / vnd betet für einander / das ihr gesund werdet / denn des gerechten gebet vermag viel/wenn es ernstlich ist / sagt der Apostel Iacobus 5. Cap.

2. Exhortatio. Vnd wenn gleich das Creutz vnd die not anhelt / müssen wir dennoch auch mit dem gebet anhalten/nicht laß noch müde werden / sondern mit David Ps. 13. sagen: HErr/wie lang wilu mein so gar vergessen / wie lang verbirgestu dein Andlig für mir / wie lang sol ich sorgen in meiner Seele / vnd mich engsten in meinem herten teglich / wie lang soll sich mein feind vber mich erheben/

Reichpredigt

heben etc. Das heist auch dem **HERRN** drey mahl geschehet / wie **S. Paulus** gethan.

3. *Consolatio.* Jedoch sollen wir dem **HERRN** nicht ziel vnd Maß / zeit vnd stunde fürs schreiben im Gebet / wenn vnd wie er vns helfen möge / auß vnsern Nöthen / Sondern vns in seinen Göttlichen willen mit Gedult heimgeben / wie denn der **HERR** **CHRISTUS** selbst gethan / da er im Garten drey mahl hingienß / vnd betet dieselbigen Wort / *Matth. 26.* Mein Vater / ist es möglich / so gehe dieser Kelch von mir / doch nicht wie ich will / sondern wie du wilt. Denn das ist die Fremdigkeit / die wir haben zu **GOTT** / so wir etwas bitten nach seinen willen / so erhöret er vns / *1. Joh. 5.* Vnd da hat **Gott** seine gewisse Ursachen / warumb er zu zeiten die Hülffe auffzeucht / davon sonst gehandelt wird: Sollen aber dennoch an der Erhöhung nicht zweiffeln / sondern vnser Seel in Gedult fassen / vnd mit **David** sagen / *Psal. 43.* Was betrübstu dich meine Seele / vnd bist so vnrühig in mir / harre auff **Gott** / denn ich werde ihm noch danken / das er meines angesichts hülffe / vnd mein **Gott** ist. Denn *Veniens veniet & non tardabit* , Er wird gewiß kommen / vnd nicht aussen bleiben / *Habac. 2.* Denn er ist *adjutor in opportunitatibus* , *Psal. 9.* Ein Helfer zur rechten zeit.

Er weiß wol / wenns am besten ist /
Vnd braucht an vns kein arge list /
Das sollen wir ihn vertrauen.

Derwegen harre des **HERRN** / sey getrost vnd unverzagt / vnd harre des **HERRN** / *Psal. 27.*

Accommodatio ad personam defuncti.

Diß ist nun auch mit dem verstorbenen Jüngern **Daniel von Arnimb** seligen / geschehen / denn wenn er zu zeiten Ruhe vnd Friede gehabt / wie bey den Leuten die beyrichtigkeit ihre intervalla hat / so hat er gebetet / Christliche Lieder gesungen / vnd in der Bibel gelesen. Vnd neben ihm habens seine liebe Mutter / Bruder vnd Schwester / an ihrem Gebet nicht mangeln lassen / Sondern aber ist das Kirchengebet für ihm bestellet / vnd fleißig geschehen / darauß er zu zeiten auch gute Linderung empfunden / aber **Gott** hat ihm seine zeit vorbehalten / biß er ihn endlich erlöset hat.

Tertia

Christliche

Tertia pars.

Lasset vns zum Beschluß auch besehen im vorlesenen Text /
Christum Dominum & responsum divinum, Wie vnd womit
der Sohn GOTTES Christus Jesus / als der rechte Jehova vnd
HERR / den Apostel Paulum getröstet / vnd was er ihm auff sein ste-
hen / für ein Antwort gegeben hab / Das berichtet vns nun S.
Paulus mit diesen Worten: Vnd er (der HERR) hat zu
mir gesagt: Las dir an meiner Gnade genügen /
denn meine Krafft ist in den schwachen mächtig.
Damit deutet er zweyerley an. 1. Das er mitten im zorn seiner gnad
vnd barmherzigkeit eingedenck sey / vnd es mit ihm also machen
wolle / das dennoch seine Gnade ob ihm bleiben solle. Welches je
dem Apostel Paulo ein herrlicher Trost gewesen sein muß. Vnd
scheinet / als weren die Wort genommen aus dem Propheten Es. 54.
Ich hab dich ein klein augenblick verlassen / aber mit grosser barm-
herzigkeit will ich dich sammeln / ich hab mein Angesicht im Augen-
blick des zorns ein wenig von dir verborgen / aber mit ewiger Gnad
will ich mich deiner erbarmen / spricht der HERR dein Erlöser. Denn
solches soll mir sein / wie das wasser Noah / Da ich schwur / das die
Wasser Noah solten nicht mehr vber den Erdboden gehen / also hab
ich geschworen / das ich nicht vber dich zürnen / noch dich schelten
will / denn es sollen wol Berge weichen / vnd Hügel hinfallen / aber
meine Gnade soll nicht von dir weichen / vnd der Bund meines frie-
des soll nicht hinfallen / spricht der HERR dein Erbarmer.

Drumb will der Sohn GOTTES zu S. Paulo sagen /
Las dir an meiner gnade auch gnüge / fasse deine seele
mit gedult / vnd trage diß leyden vnd Creuze williglich / wie schwer
es dich auch ankömpt / vnd sprich mit David / Psal. 73. HERR
wenn ich nur dich habe / so frage ich nichts nach Himmel vnd Er-
den / vnd wenn mir gleich mein Leib vnd Seel verschmachtet / so bi-
stu doch Gott allezeit meines Herken trost vnd mein theil.

Ja mit dem heiligen Job: Et jansi occiderit me Dominus,
tamen sperabo in eum, Wenn mich gleich der HERR tödtet / so
will ich dennoch auff ihn hoffen / cap. 13.

2. Darnach zeigt er ihm die sondere Weiß / wie er den Chri-
sten

Reichpredigt?

ken pflege zuhelffen / Denn / spricht er / **Meine Krafft ist in den Schwachen mächtig.** Das ist nun der rechte güldene Spruch / welcher wol einer sonderlichen Predigt werth were / vnd den D. Lucher oft in seinen commentariis widerholet / vnd also erkleret: Omnia opera DEI fiunt in mediis contrariis. Wenn Gott wirckt vnd helffe. i will / so macht ers gar widersinnlich / wen er stercken will / den macht er zuvor schwach / wen er lebendig machen will / den tödtet er zuvor / den er reich machen will / den leßt er zuvor arm werden / den er erhöhen will / den erniedriget er zuvor / ja dem er den Himmel geben will / den stößt er zuvor in die Helle / 1. Sam. 2. denn die rechte hand des Höchsten kan alles endern / die rechte des HERRN behest den sieg / die rechte des HERRN erhöht. Psal. 77. **Vnd seine Krafft ist in den Schwachen mächtig.** Wo wir schwach sind / da will er starck vnd mächtig sein / wo wir veracht vnd verlassen sein / da will er vns zu ehren helffen / wo es scheint / wir stecken in Todt vnd in der Hellen / da will er vns zum leben vnd in den Himmel bringen / auff das die vberschweneckliche krafft sey Gottes / vnd nicht von vns / vnd er den rhumb habe vnd behalte / das man sagen muß / das hat Gott gethan / vnd mercken / das es sein werck sey. Psal. 64. Wie dahin auch D. Luthers Scholion bey den erklereten Worten sihet / da er spricht: Mit diesen Worten tröstet Christus alle die in schwachheit oder leyden sind / denn er kan seine stärke in vns nicht beweisen / wir sind denn schwach vnd leyden.

Accommodatio ad personam defuncti.

Diß responsum diuinum, vnd vertröstung des Sohns Gottes / dem H. Apostel Paulo geschehen / hat sich nun auch im Werck ereignet / an dem verstorbenen Juncker Daniel von Arnimb seligen / denn kein zweyffel gewesen / das er bey dem schweren zustande / dennoch einen gnedigen Gott gehabt vnd behalten / der ihm offemahls mitten in der Benrichtigkeit / einen gnadenblick hat scheinen lassen / durch Krafft vnd Trost seines Göttlichen worts / das er eins auffgeschrieben: **Gott marter mich aus liebe oder Eifer / so leide ich nit aus vnbarhertzikeit.** Sondern wie David Ps. 118. sagt: **Gott züchtiget mich wol / aber er vbergibt mich dem Tode nicht / vnd wie bey dem Nicephoro lib. 17. Cap. der schöne Spruch gesetzt wird: Semper Deus vindictæ gladium miserationis oleo exacuit.** Der HERR verstoffet nicht ewiglich / son-

E

der

Christliche

bern er betrübet wol / vnd erbarmet sich wider nach seiner grossen
güte/denn er nicht von herken die Menschen plaget vnd betrübet /
Thren. 3.

So hat auch der verstorbene Juncker Daniel von Arnimb so
Gottes mächtige krafft in seiner schwachheit besun-
den/das es sonsten vnmenshlich vnd vnmöglich were gewesen/ den
harten stand zuverstehen/vnd er wol mit Paulo sagen mögen Ro-
man. 7. Ich elender Mensch/ wer wird mich erlösen von dem Leibe
dieses todes? Ich dancke Gott durch Jesum Christu vnsern Herrn.

Sonderlich hat sich solches bey im befunden/ da es fast mit im
zum ende kommen. Denn von der zeit an / da anfangs des neuen
jahrs/nemblich den 14. Jan. dieses lauffenden jars/ allhier seine lie-
be mütter auch seliglich entschlaffen/vnd ihm solches angezeigt/ist
er diß halbe jahr/mehres theils trawrig gewesen / je länger je stiller
worden/wenig von speise zu sich genommen / vnd dermassen am Leibe
abgezehret/das fast nichts als haut vnd bein an im gewesen/ vnd da-
rüber an allen kräften abgenommen/biß Gott der Herr drey tage für
seinem seligen ende/seine mächtige krafft in seiner Schwachheit / je
länger je mehr zuerweisen angefangen / also / das er wider zu guter
vermunfft kömen/selbst viel vnd fleissig gebetet/seines sterbstündleins
sich erinnert/von herken begehret aufgelöset zu sein/vnd mit aufge-
hobenen händen gesagt vnd geruffen: **Herr Jesu nim mei-
ne arme Seele in deine hende.**

Deßwegen Herr Christoph von Arnimb/am Sonntag vierze-
hen tage/den 8. Aug. anfenglichs frü vor der Predigt/ als er in eine
starcke Ohnmacht gefalle/das man fast gemeinet/er würde darinnen
bleiben/meinen Collegam, den Diaconum Hermannum Cran-
tzium hernach auch neben ihm / mich zu ihm fodern lassen /
da wir mit Dancksagung vnd verwundern gesehen vnd angehört /
das Gott seine Gnad ihm reichlich bewiesen/ dann er sich mit den
schönsten sprüchen selbst getröstet/vnd trösten lassen/als/ Ruff mich
an in der zeit der Noth/ so will ich dich erretten / vnd du solt mich
preysen/Ps. 50. welches er aus eigener andacht gesagt/ Item/ Joh.
16. Ein weib weis sie gebieret/ hat sie trawrigkeit/vnd solche schmer-
zen sagt er/hab ich iht auch. Darauff er getröstet worden/dz er sich
bald durch Gottes gnade würde erlöset werden/welches Herr Chri-
stoph von Arnimbs Hauptfraw/uebek solter lieben Schwester / der
frawen

Reichpredigt

frawē von Blanckenburg selbst mit angehoret. Die schönen kirchen
gefänge: Allein zu dir **HERR** Jesu Christ / etc. Ein
feste burg ist vnser Gott / etc. Aus tieffer not schrey
ich zu dir / etc. **HERR** Jesu Christ war mensch vnd
Gott / etc. hat er eins theils selbst angefangen / eins theils mitge-
sungen vnd gebetet / wie er denn dazumahl sonderlich anfieng:

Vnd ich wil ihn mit starcker hand /

Reissen aus des todes band.

Welches ich vnd mein Collega, vollends mit ihm hinauf gebetet /
vnd er vns nachgesprochen. Als ich zur Vesperzeit wider zur Kir-
chen gehen / vnd meinen abscheid von ihm nehmen wolte / vnd sagte:
Ich wolte in der Kirchen das Gebet widerumb für ihm bestellen /
das Gott in bey guter vernunft / vnd in warem glauben stercken vnd
erhalten wolle / vnd es mit seiner schwachheit zum guten ende schi-
cken / gab er mir die hand / vnd sagte gar bedächtlich: **Ach es were**
hohe zeit. Den Mittag hat sich seine beschwerung zu zeiten mit
gefunden / da er doch oft seine Hände zusamen geschlagen / vnd den
lieben Gott angeruffen vnd gebetet: Erbarm dich meiner armen see-
len / die du erlöset hast / Item: Meinen Geist befehl ich dir **HERR** in
deine hände / du hast mich erlöset / du getrewer Gott. Auch vnter an-
dern angefangen vnd gesagt: Ach wie lange wehrets doch / che du die
Himelspforte wilt aufschliessen. Vnd in der andacht ist er also
blieben durch Gottes gnad / das er mit der Fraw von Arnimb / vnd
ihrer lieben Tochter / jungfraw Lucretia / vnd seiner Schwester / der
fraw von Blanckenburg / oft gesungen vnd gebetet: **Christus**
der vns selig macht / kein böses hat er begangen /
der ward für vns in der nacht / als ein dieb gefan-
gen / etc. Item: **HERR** Jesu Christ war Mensch
vnd Gott / etc. Item / die schönen sprüche: 1. Joh. 1. Das blut
Jesu Christi / des Sohns Gottes / macht vns rein von allen Sün-
den. Ps. 50. Ruffe mich an in der zeit der noth / so will ich dich erret-
ten / vnd du solt mich preysen. Ist oft erinnert worden der wort **S.**
Pauli / Phil. 1. Christus ist mein leben / sterben ist mein gewin. Ich
begehre auffgelöset / vnd bey meinem **HERRN** Christo zu sein. Dar-
neben gefragt / ob er auch Christum für sein leben / vnd ein selig en-
de / für seinen besten gewin achte / vnd gern von seinē elende erlöset sein
wolte / darauß er ja gesagt / wenn Gott wolte. **Sind**

Christliche

Sind im auch die Wort der einsetzung des hochwürdigen Abendmahls fürgesagt worden/ darauff er gleichfalls anzeig gegeben/ das er herzlich des HErrn Nachtmahl zugebrauchen begehre/ vnd gesagt/das ist mein bester trost. Aber weil er nichts zu sich nehmen/ noch bey sich behalten könnte / ist er in dem Nothfall des Sprüchleins Augustini erinnert worden: Crede & manducasti.

Den Montag zu Abend ist im wider eine starcke Ohnmache zugestossen / das man sich vnter der Mahlzeit/ seines Endes versehen/vnd meinen Collegam, den Caplan holen lassen / da ihm fürgebetet/vnd er mit Sprüchen Heiliger Schrift getröstet worden/ als sonderlich Johan. 3. Also hat Gott die Welt geliebet. Ist ihm auch das Gebet fürgesprochen. Ach HErrre Gott/ in meiner noth/ ruff ich zu dir. Item/der Glaub/vñ das Vater vnser. Die nacht ist er gar schwach gewesen/das er auch gesagt: Ich will fort / laß mich gehen/vnd haltet mich nicht auff / an meinem leben ist doch nichts mehr / hat auch seine Hände zusammen geschlagen vñnd gesagt: Gott sey gelobet vnd gebenedeyet.

Endlich gestern 14 tage / da ich Amptshalben verreiset/ haben sich die starcken Ohnmachten funden/ das er immer schwächer worden/vnd es sich mit im zum ende genahet/da M. Meth/die frau von Arnimb/derß gleichen die frau von Blanckenburg/ in seines Erlösers vnd Seligmachers Jesu Christi abermahls erinnert/ ob er auff den leben vnd sterben wolle / hat er nicht allein deutlich ja gesagt/sondern auch mit seuffzen vnd lezten neigenden häupt solches bezeuget/biß er also in wahrer anruffung Jesu Christi/ sanfft vñnd seliglich/ohn allen schmerzen vnd eufferlicher anzeigung/einiger todes angst/aus dieser Welt abgeschieden. Welches geschehen gestern 14. Tag/ am 10. August. welches war der tag Laurentii/ nach mittag/zwischen ein vnd zwey vhr/als er 35 jahr alt worden. Vñnd wir nunmehr recht von ihm singen vnd sagen mögen:

Sein jammer trübsall vnd Elend/

Ist kommen zu cim seligen end /

Er hat getragen Christi Joch /

Ist gestorben vnd lebet noch.

Vñnd weil das ende mit ihm gut gewesen / ist es nun alles gut worden/ vñnd ist das zeitlich leyden / das er hier auff Erden aufgestanden/

Leichpredigt

standert/nicht werth der Herrlichkeit/ die künfftig an ihm soll offen-
bahr werden / Rom. 8. Diß wird dem lieben GOTT zu Ehren /
billich nicht verschweigen/der seine grosse Barmherzigkeit an ihm
noch hat sehen lassen / vnd weil der sein bestes gewist / vnd ihm al-
so gefallen / das er ihn aus diesem Jammerthal/ jedoch Christlich
vnd seliglich abgefodert/ist ihm dafür lob vnd danck zu sagen/ das
er dennoch vnser Gebet nicht gar vergeblich hat sein lassen.

Vsus 3. partis generalis.

Neben diesem ist erklärten Text S. Pauli vnd angestalteter
erzählung/von dem verstorbenen vnd in GOTT ruhenden Junckern
Daniel von Arnimb / sollen wir nun zum Beschluß der
Predigt kürzlich erwegen vnd betrachten die Ursachen / Wa-
rumb doch Gott der HERR zulasse/das die Men-
schen eine zeitlang ihrer Sinne beraubet vnd bey-
rechtig werden / vnd dennoch zu zeiten wieder
zurecht kommen / das das ende mit ihnen gut
wird/vnd seliglich schliessen. Vnd solche Ursachen
sind fürnehmlich auff dreyerley weiß/nach anlehnung GOTTES
Worts zubedencken.

I. Respectu DEI, das man darauff Gottes zorn vnd gerechtig-
keit/vnd denn auch seine warheit/kraft vnd allmacht erkenne.

1. Seine Gerechtigkeit vnd strengen Zorn sihet man in sol-
chen fällen/denn gewiß ist / das diese vnd andere Vnfälle / die den
Menschen begegnen können/lauter fruchte der Sünden sein / vnd
da GOTT dieselben nach vnserm verdienst heimsuchen wolte / hetten
wir dergleichen vnd noch grössers zwar allzumahl wol verdienet.
Drumb soll es hie heissen/wie wir unjungen pflegen.

S Menschen kind bedenck das reche/
Wie Gottes zorn die Sünde schlegt/
Ehue dich dafür bewarent.

2. Seine Allmacht vnd Göttliche Krafft aber/bewenset er da-
mit/das er einem Menschen nicht allein den Verstand / Sinne vnd
vernunft geben / sondern auch in einem Augenblick widernehmen/
vnd endlich/wenn es ihm gefellig ist/ auch wiedergeben kan. Wie
vonn

S ij

Christliche

vom Nebucadnezar geschrieben stehet/ Dan. 4. solches sey vber ihn beschlossen/im rath der Wächter/vnd im Gespräch der heiligen betrachtet/auff das die lebendigen erkennen / das der höchste Gewalt hat vber die menschen. Vnd Joh. 9. Es hat weder dieser/noch seine Eltern gesündigt/sondern das die Werck Gottes an ihm offenbahr würden.

3. Seine Wahrheit vnd Barmherzigkeit/ das er aus gnaden widerhelffen/vnd vnser Gebet erhören wolle / das wir ihn dafür zu danken haben sollen. Denn weil er nicht lust hat am tod vnd verderben der menschen/wie er es mit ein tewren end bestetiget Ezech. 33. vnd die menschen nicht von herzen plagt/sondern sich irer wider erbarmet/ Ehen. 3. auch der Sohn Gottes mit ein doppelten End verspricht/ Joh: 16. Warlich/warlich/ich sage euch/so ihr den Vater etwas bitten werdet in meinem namen/ das wird er euch geben/ vnd wir bisher auff solch vertrauwē gebetet haben / hat er vns also erhöret/das wir sagen vnd rühmen müssen/Ps 33. Des HERRN Wort ist warhafftig/was er zusagt/das helet er gewiß.

II. Respectu defuncti & aliorum furiosorum. Wenn Gott bey den Leuten etwan mercket/das sie sich ihrer hohen Gaben vberheben möchten / vnd derselben mißbrauchen / wie es gemeinlich pfleget zuzugehen/nach dem Spruch/Psal. 62. Grosse Leute fehlen auch/ vnd Seneca spricht: Nullum magnum ingenium sine mixtura dementiæ est. Da henger er denselben durch solche Verrichtigkeit einen knüttel an/wie an S. Paulo zusehen/ Auff das ich mich nicht der hohen offenbarung vberhebe/ Vnd heisset allhier/wie 1. Cor. 11. stehet: Wenn wir gerichtet werden / so werden wir vom HERRN gezüchtiget/damit wir nicht sampt der Gottlosen Welt verdampt werden.

III, Respectu piorum & lugentium, das wir von solchen Leuten nicht frevel vrtheil fellen/oder sie verdammen/ Sondern wissen/das solche Verrichtigkeit inen an irer Seeligkeit nicht schaden müsse/sondern das ihr bekümmerniß vnd elend in diesem leben / mit der innerlichen Geistlichen Freud des Herzens/im zukünftigen leben aber/mit sonderlicher Herrligkeit solle erstattet werden / dessen sich die angewandte Adelige Freundschaft/ des in Gott verstorbenen Daniel von Arnimbs auch zu trösten hat. Denn

Hie ist

Leichpredigt

Hie ist er in angst gewesen /
Dort aber wird er genesen /
In ewiger fremd vnnnd wonne /
Leuchten wie die helle Sonne.

Nach der verheissung Christi. Matth. 5. Selig sind die da sende tra-
gen/denn sie sollen getröstet werden.

Vnd daher sollen wir auch nicht allweg nach dem zeitlichen
trübsall vnd elend/von dem zorn Gottes gegen vns schliessen/wie
hiergegen auch auß zeitlicher Wolfart/von Gottes Huld vnd gnad
nicht soll gevrtheilet werden/sondern aus dem wort Gottes.

Darnach sollen wir allesampt darauß erkennen/was gesunder
Leib vnd vollkommener rechter Verstand/ für eine edle gabe Got-
tes sey/vnd demnach Gott dafür dancken/ mit den beyrheiligen ein
mittlendn tragen/für sie beten/auch ein jeder für sich selbst/

Vt sit mens sana in corpore sano,

Du Schöpffer aller Dinge/
Du Väterliche Krafft/
Regierst von ende zu ende/
Kräftig aus eigener macht/
Das Herz vns zu dir wende/
Vnd Lehr ab vnser sinne/
Das sie nicht irren von dir.

Gott verlenhe dem verstorbenen eine fröliche auferstehung /
tröste die betrübten/erzeige den schwachen seine krafft/ vnd gebe vns
allen/was vns nützlich ist an Leib vnd Seel.

Votum.

Das helff vns Christus vnser trost/
Der vns durch sein blut hat erlöst/
Vns teuffels gewalt vnd ewiger pein/
Ihm sey lob Preis/vnnnd Ehr allein/Amen.

E N D E.

Handwritten in blue ink: **La 742 QK**

Faint, illegible text, likely bleed-through from the reverse side of the page.

Handwritten in blue ink, possibly a list or index of items, though the text is mostly illegible.

Handwritten in blue ink, possibly a list or index of items, though the text is mostly illegible.

Handwritten in blue ink, possibly a list or index of items, though the text is mostly illegible.

Handwritten in blue ink, possibly a list or index of items, though the text is mostly illegible.

Handwritten in blue ink: **1077**



QK. 282

21

25



X 2044097 Leic
Ausß der 2. C
an die Cor

Wey dem
des Edlen vnd
ckern/Daniel von
ligen Sohn/au
gefessen zu
Welcher ein ge
richtigkeit gelegen/En
gnade/ wider zu guter ver
S. Laurentij zu Magdeb
entschlaffen/daselbst auch b
Ceremonien zur erden best
S. Bartholomæi/ am 2
Derwegen in dieser
schicht/wie man sic
Fälle richten /



Geh
Phillip Han/D
Mag
Gedruckt bey
M.



Kodak
LICENSED PRODUCT

KODAK Color Control Patches
© The Tiffen Company, 2000

Inches 1 2 3 4 5 6 7 8
Centimetres 1 2 3 4 5 6 7 8

Blue Cyan Green Yellow Red Magenta White 3/Color Black

